

Uunga siunnersuut: Nioqqutissanik eqqussuinermi akitsuutit pillugit Inatsisartut inatsisaata allangortinneqarneranik Inatsisartut inatsisaat
(Aningaasaqarnermut Akileraartarnermullu Naalakkersuisoq)

Akissuteqaat

(Aningaasaqarnermut Akileraartarnermullu Naalakkersuisoq)

Pingajussaaneerreqarnera

Siunnersuut siullermeerneqarnerani aappassaaneerreqarneranilu tamanit taparserneqarpoq, tamannalu tunngavigalugu ataatsimiititaliami suliarineqarnissaa innersuussutigineqanngilaq.

Naalakkersuisut pingajussaaneerreqarneranut allannguutissatut siunnersuummik saqqummiussinikuupput. Allannguutissatut siunnersuut imeruusaatinut puunik eqqussuinermi akitsuutip akiata appartinneqarneranik kinguneqarpoq. Allannguutissatut siunnersuummi puunut akitsuutit annertussusai puumut ataatsimut 0,25 literimut 2,00 kr.-nit 1,40 kr.-nut, taavalu puumut ataatsimut 0,25 literi sinnerlugu annertussusilimmut 3,50 kr.-nit 2,90 kr.-nut appartinneqarput. Allannguutissatut siunnersuut agguaanneqartoq innersuutigissavara.

Aningaasanut inatsimmik isumaqatiginninniarnernut atatillugu, Naalakkersuisut puunik utertitsisarnermik aaqqissuussuinermi nutaami aningaasartuutit pisiniarfiit taamaalillunilu neriunartumik atuisut aningaasartuuteqarnerunissaat pinngitsoortinniarlugu allannguutissatut siunnersuummik saqqummiupput. Appaanerup allaffissornermut akiliut pisiniarfiit puunik utertitsisarnermik aaqqissuussinerup nutaap ingerlanneqarneranut akiliutissatut naatsorsuutaasup assigaa.

Allannguutissatut siunnersuut puut sumiiffinnut Qaanaamut, Ittoqqortoormiinit Tasiilamulluunniit taakkualu nunaqarfiinut eqqunneqartut akitsuutaannik akiliisoqartannginnissaanik aamma imaqarpoq. Akiliisitsinnginnissamik immikkut akuersissuteqarnermik ukiorpassuarni aaqqissuussineq atuuttoq inatsisikkut aalajangersarneqarpoq, taannalu malillugu (kommuniunikuni) Qaanaami, Ittoqqortoormiini Tasiilamilu immiaaqqat aamma imeruusaatit suulluunniit kulsyrimik akullit puuisa akitsuutaannik akiliisoqarneq ajorpoq. Allannguutissatut siunnersuummi nunatsinni sumiiffinnut taakkununga imeruusaatinik eqqussuinerup nunatsinni sumiiffinnut allanut sanilliullugu akisunerunera tunngaviuvoq. Siunnersuummi siunertaq tassaavoq imeruusaatinik taamaattunik atuisunut akit nunatsinni tamani assigiimmik qaffasissuseqarnissaasa qulakkeerneqarnissaa. Akileraartarnermut Aqutsisoqarfiup ilaatigut imeruusaatinik eqqussukkanik nunatsinni sumiiffinnut allanut assartuisoqartarnersoq paasiniarlugu immikkoortumi ineriartorneq malinnaavigissavaa. Taamaattoqarpat aalajangersagassatut siunnersuutigineqartup allangortinnissaanik siunnersuuteqarnissaq pisariaqassaaq.

Taamatut oqaaseqarlunga siunnersuut Inatsisartunut suliassanngortippara.